



Akcije

Napokon uhapšen Kemal Čaušević!

Pripadnici Agencije za istrage i zaštitu BiH, u akciji kodnog naziva Pandora, u srijedu, 18. juna u Sarajevu uhapsili su Kemala Čauševića, bivšeg direktora Uprave za indirektno oporezivanje BiH (UIO) i još nekoliko desetina osoba, djelatnika UIOBiH



Sa privođenja u akciji Pandora

Pripadnici SIPA-e, u akciji Pandora, u srijedu, 18. juna u Sarajevu uhapsili su Kemala Čauševića, bivšeg direktora Uprave za indirektno oporezivanje BiH (UIO) i još nekoliko desetina osoba, djelatnika UIOBiH, potvrđeno je iz Tužilaštva BiH

Pretrazi i hapšenja

Nezvanično, među uhapšenim su i Zdravko Cvjetinović, pomoćnik direktora Sektora za carine UIOBiH, Alija Mašić, šef Carinske ispostave Sarajevo, Nedeljko Milovanović, bivši šef Carinske ispostave Bosanske Gradiške, Milenko Nikić, bivši šef Carinske ispostave Bosanski Brod, kao i jedan od aktualnih glavnih ljudi carine Bosanski Brod Avdija Škahić.

Iz SIPA-e i Tužilaštva BiH, po čijoj naredbi su izvršena hapšenja i pretrazi više desetina lokacija na području cijele BiH, naveli su da su Čaušević i ostali osumnjičeni za koruptivna krivična djela, poput carinskih i poreznih utaja, nezakonitog opraštanja poreza i povrata poreza na dodatnu vrijednost, pranja novca i zloupotrebe položaja ili ovlaštenja u vezi sa uvozom tekstilne i druge robe u BiH.

U akciji koja je izvedena na području Brčko Distrikta, te na više desetina lokacija na području Sarajeva, Tuzle, Banje Luke, Prijedora, Prnjavora, Gradačca, Srebrenika, Bijeljine, Zvornika, Tešnja, Čelića, Doboja, Čelinca, Broda, Gradiške, Kozarske Dubice, Dervente, Bihaća, Kotor-Varoši, Kiseljaka i Ilijaša, do zaključenja ovog broja Dana uhapšene su ili stavljene pod nadzor ukupno 54 osobe, te izvršeni pretrazi velikog broja objekata.

Nekretnine u centru

Ova akcija je, navodno, vezana uz slučaj Anesa Sadikovića, nekrunisanog kralja tekstila i kineske robe u BiH, koji je u septembru



Hapšenje Kemala Čauševića

Čaušević i ostali osumnjičeni za koruptivna krivična djela, poput carinskih i poreznih utaja, nezakonitog opraštanja poreza i povrata poreza na dodatnu vrijednost, pranja novca i zloupotrebe položaja ili ovlaštenja u vezi s uvozom tekstilne i druge robe u BiH

2012. sa svojim bratom Ismetom i nekoliko rođaka uhapšen u akciji SIPA-e kodnog naziva Boss.

Podsjetimo, Čauševića se u vezi s organizovanim kriminalom dovodi već godinama. Na mjesto direktora UIOBiH došao je 2004. a na toj funkciji je bio do 24. februara 2011, kada ga je dužnosti razriješilo Vijeće ministara BiH. U aprilu prošle godine, Sud BiH mu je blokirao pozamašnu imovinu, tačnije 11 nekretnina koje su bile na njegovo ime, a koje se procjenjuju na oko 1,5 miliona KM.

Čaušević je 2006. i 2007. godine kupio tri stana u blizini zanatskog centra Stakleni grad u Sarajevu za koje je izdvojio 262.000 KM. Među nekretninama koje Čaušević posjeduje su i poslovni prostor u Staklenom gradu u vrijednosti od 76.000 KM, te još dva poslovna prostora za koje nije procijenjena vrijednost.

Pored toga, ovaj "uspješni" bivši državni-sluzbenik je "na sebi" imao i još dva stana u jednoj od centralnih sarajevskih ulica, poznatoj Ferhadiji, čija je vrijednost 221.000 KM, kao i tri parcele na poznatom sarajevskom vikend-boravištu Poljinama u vrijednosti od 280.000 KM. Zanimljivo, Čaušević je sve ovo uspio otplatiti u rekordnom roku - za samo sedam godina.

Mukotrpn rad

O Čauševićevom "mukotrpnom radu" među prvima je

svjedočio Edin Cernica, bivši šef Carinske ispostave UIOBiH, nakon čega je, dakako, smijenjen. Međutim, to ga nije spriječilo da određene dokumente dostavi Tužilaštvu BiH. Nakon toga je organizovana akcija kodnog naziva Boss, u kojoj je uhapšen spomenuti Anes Sadiković, koji se u medijima pojavljuje kao švercer tekstila. Špekuliše se da je Čaušević Sadikoviću dozvoljavao uvoz tekstila s lažnim deklaracijama o porijeklu robe.

Tokom istrage i eventualnog suđenja bivšem direktoru UIOBiH će se dokazivati da li je, kako se sumnja, imao razgranatu mrežu preko koje je sakupljao reket.

Druga ključna figura u akciji Pandora je Zdravko Cvjetinović, aktuelni pomoćnik direktora UIOBiH za sektor carina, koji je uhapšen na graničnom prijelazu Bosanska Gradiška u pokušaju bijega iz BiH. Cvjetinović je osuđeni za stvaranje kriminalne organizacije s ciljem uvoza kineskog tekstila po povlaštenim uslovima. U toj grupi povlaštenih je, navodno, bio i Anes Sadiković koji se trenutno nalazi na slobodi - u Crnoj Gori. Sadikoviću i Sedinetu Kariću iz Srebrenika je, kako se sumnja, Cvjetinović omogućio da uz veću novčanu naknadu imaju monopolski položaj na tržištu tekstila.

O razmjerama kriminala koji istražuju tužitelji Tužilaštva BiH i pripadnici SIPA-e dovoljno govori podatak da su Sadiković i njegovi rođaci, u posljednjih nekoliko godina, uvezli robu u vrijednosti od nekoliko milijardi KM, te da je tom prilikom budžet BiH oštećen za čak 300 miliona KM.

Navodno, Čaušević je bio stvarni organizator uvoza tekstila, ali te informacije će biti potvrđene ili negirane tokom buduće istrage i eventualnog sudskog procesa. (D. Omeragić)